

In zurg verloare

't Ouwe joar dat lupt aaf
't Nuje wurd geboare
Noe is de welt kakelbontj
Murge weer in zurg verloare

Wiel Roeselers

Wunsj vuur de fieesdaag en 't nuje joar

Vieër wunsje uch allemoal sjoëne fieesdaag,
Dat 't uch allemoal veuël bringe maag.
Vuur 't nuje joar nieks dan good,
Verlees in jieëder geval neet de mood.
't Belangriekste is toch een goeije gezondjheid op de welt,
Vieër hoape dan ooch dat die vuur uch allemoal is besjilt!
En vuur sjtrak: inne hieële sjoëne vastelaovesdied,
Geneet d'r van, want wat-ste gehad has, rak-ste noeëts mieër kwiet!

Ron Logister.

Vuurnumme

Ich hub mich neet vuurgenomme
De toebak te loate sjtoan
Ooch neet 't gleeske beër
Aan mich vuurbiej te loate goan
Ich prebeer gans gewuën
En oprecht vanaaf huuj
Mien hart oape te sjtille
En te geleuve in de luuj

Wiel Roeselers

Zurgverzieëking

Vanaaf 2006 kinne vier de "Zurgverzieëking",
De introduksie doa van is toch een happening.
Went gene wit wat os dat de kommende joare bringt,
Wat os mit deë ganse trammelant boave de kop hingt!
Finansjeel zulle vier d'r neet op vuuroet goan,
En of de kwaliteit van de zurg omhoeëg zal goan?
Is 'n onbeantwoerde vroag de kommende tied,
Mér één dink is zieëker: een sjtukse zieëkerheid zunt v'r kwiet!

Ron Logister.

Doa zit moezik i

Sjoëen getekent durch 't leëve
't Libretto va ing melodie
Sjtroalend is 't os gegeëve
Wie ing kreatie op ding melodie

Sjteet es inne poal boave water
Hej zit moezik in
En geen parodie op later

En es inne 't wete kin!

Jan Halmans

Ontnuchtering

Drank in alle soorte

Eëte hul uëver trul

De luuj zint oetgeloate

Were van de uëverdoad dul

Sjtrakke sjtriepe in de loch

Sjpatte oet ee in 'n bontje perrepluuj

Groeëte wolke kroetdamp

Zitte zich vas in de luuj

1 Jannewarie 't journaal

Mit ieëlenj en verdreet

'n Weltwieje ontnuchtering

Die etalage van 't groeëte leed

Mit de kroetdamp in de oge

En de champagne nog in de kop

Kom ich der hieël vlot achter

Dat van de welt nieks klop

Wiel Roeselers

't TREESKE...

....noam gister gans ónverwachs aafsijed van de firma woeë 't ing groeët deel van zieng leeëve houw gewirkt.

Bauw noeëts d'r krankesjien, ummer vrundlich en opgewekt, mer noeëts noadrukkelig aawezig, beheurde durch de joare hin um 't zoeë mer ins te zage tot de hoesroad.

't Zach neet vöal en woeëd doarum durch de mieëste koempele neet vuur gans vol aagezieë.

't Reseltaat woar óch dat 't zoeëwaal durch de mansluj as durch de vrouwluj op 't kantoer neet serieus genoame woeëd.

Mit 't Treeske begós-te gee gesjprek, góng-ste gee discussie aa.

Treeske goaf-ste alling mer ópdrachte of doe zoags 'm geweun neet sjtoan.

Wen 't probleme goaf op 't kantoer reep ummer waal ins inge vuur de wiets "dat mótte vier aan 't Treeske vroage".

D'r woeëd ieësj gekieëke of 't neet in de buët woar, want wietse make uëver angere dees-te nit wen 't sjlachóffer zelf d'r bij is, en 't geet dus neet same mit heldhaftigheid.

Woar 't Treeske wàal doa, dan reepe ze döks," noe hób ich zin in ing teske kaffe".

Da leep 't Treeske gegarendeerd nuëge van de tieën kier noa d'r kaffeapperaat en koam da mit ing vol deenblaad trük.

Hinger zieng ruk woeëd dan ing eugsjke gepitsjt.

Wat 't prive-leëve van 't Treeske betróf, doa wis ginge óch mer get vanaaf.

Zelf sjproak 't doa noeëts uëver, en ginge houw oeëts d'raa gedach om heur doa get uëver te vroage.

't koam da óch wie inge dóndersjlaag bei kloare hieëmel wie 't Treeske gistermiddig effe noa vief oer vroeg of 't effe get moch zage umdat 't heur letste wirkdaag woar.

Durch umsjtendigheede woeë-uëver 't wieëer nieks zach, woar noe 't moment aagebroake woeë-op 't financieel zelsjtendig woar.

't Houw ing hoes gekoch in Italië, aa de Golfo do Squillage, en doa zouw 't goa woeëne, same mit hóar vrunk, 'nne Italjeënsje moeziekmeëker.

't Woar nog noeëts zoeë sjtil op 't kantoer en d'r woeëd nog noeëts zoeë good geloesterd noa 't Treeske.
Mit ing lóch lechsijke om heure mónk zach 't nog dat 't neet de indruk houw dat 't erg gemis zouw weëde.....en toen woar 't voet...

Thei Janssen

Tevrije zun mit wats-te hubs

't is al lang geleije,
Toen woare de luuj nog tevrije.
Mit datgene wat d'r vuur hun woar,
Geen geklaag, geen bezjwoar!
Mér noe wilt jieëdereë mieër,
Ummer weer, kieër op kieër!
't Biste is neet good genug,
D'r wurd ummer mieër bie gekoch!
Is dat materialistische de zin van os besjtoan,
Of motte vier toch angesj in 't leëve sjtoan?

Dink ins noa uëver de zin van dien besjtoan,
En loat doa bie de volgende gedachte doeër diene kop goan:

Es-te tevrije bis mit wats-te hubs,
Kint 't zieën dats-te inne gewonne wedsjtried lups!!!

Ron Logister

Sjnieë

Wie witte ploetze vilt 't oet gen loch
Vrouw Holle kriet van heur werk geen genug
Wie sjtubsoeker hecht 't zich aan sjtroek en boom
Op ins is 't zoeëveuel wie 'n dieke loag room
De kinjer die vruije zich, boewe forte make kreeg
Of kneë 't wie der bekker ziene deeg
Dan opins versjient de zon om der hook
En zakt de sjpas in ee wie ene sjlagroomkook

Wiel Roeselers

Sjoeën

't Sjunste va dizze welt,
is neet 't good of 't geld.
't Is went vruid mit leed,
i leefde weëd gedild.

't Sjunste va dizze welt,
is wat ummer deet mittelle.
De leefde gans gewis,
die nog ummer 't sjunste is

Jan Halmans

Tevoot...

Wat zou d'r Hoebeët waal verdene ?
Deë leeëft wie in de beste tied.
Goan ich ins eëve noa d'r winkel,
bin ich 'n haove moandloeën kwiet

Zestig euro vuur ing humme
't doebele vuur ing paar sjoon
twieë euro vuur 'n teske kaffe
ich weet neet woeë ze dat van doon

D'r Hoebeët hat óch inne auto
Heë kin geweun neet mieë tevoot.
Sjtraks geet heë dat dink nog pakke
wen heë wer effe kakke mó't

En dan...wat kries'te wen'ste doa bis?
'n keuksjke mit get sjlappe tieë,
ne...loat mich geweun mar wier leëve
ich goan tevoot noa de weesee.

Thei Janssen

De wintjer kumt der aa

De wintjer kumt dr aa
Ich zieën 't aan de loch
Jagende wolke grau en gries
Dan weet ich al genug
De blome zunt weg
De beum zunt kaal
De zon is flauw
En de windj is sjraal
't Is noe ech patsje-weer
Sjerpe windj hoe ich van beuëk
De wintjer kumt der aa
Ich veul 't in de kneuëk

Wiel Roeselers

Broenssems ...

Kósse ze in de gemeenteroad,
in 't Broenssems konversere,
dan zouwe zich vuur politiek ,
vöal mieë miensje intressere,
dan koam de aahank van de roeë en de greune,
óch loestere noa de debatte, op de tribune.

Ich weet waal dat 't lestig is,
dat Broenssems dialek,
mar óch al velt 't soms waal oet de toeën,

deë zich doa aa sjtuurt,
dat is inne haove gek.

Wat mich betref, dan moag d'r sjriever,
alles in 't Hollensj ópnotere,
want Broenssems sjrievie is neet nieks,
doa móste vuur sjtudere.

Die luuj höbbe nog neet in de gate,
dat ós sjoeën paradesjtad
van alle Limburgse plaatsje
t sjoeënste dialek óch hat

Thei Janssen

Kling Meédje

Ee kling meédje oet de Musschemig
Leep mit ee boeketje va wil blomme, oet gen veld
Gans i gedanke vuur zig
In 't angere hendje houw 't geld
De blomme woare vuur ee kink dat woar erg krank
't Meédje woal vuur 't geld ing keëts kope
Béj Antonius i gen Vrank
Ginne weëg woar vuur heur te lank um te lope
Vuur beëtersjap en dank

Jan Halmans

D'r Kloon kint geëve

Biste op zeuk noa vruid en sjpas in het leëve,
Inne kloon kint dich dat zieëker geëve.
Went d'r kloon hilt dich inne sjpegel vuur,
Joa, heë is puur ammesement, 'n onmisbaar figuur.
Heë lieët dich zieën wie 't leëve werkelijk is,
Mit inne lach en 'n troan, hiel gewis.
D'r kloon prebeert dich 't leëve draaglik te make,
Kiek en loester noa heuëm en vergeët effe alle angere zake.
Bie d'r Kloon rakste net es in de vasteloavestied,
Alle zurge en ambras vuur effe kwiet!

Ron Logister.

Vasteloavesgeveul

Vasteloavend 't fieës der fieëste is neet alleen mer in de café op de kis houwe.
Nee karnavalis zin is mieë.
't Is 'n leëveesaard.
De Bourgondische leëvessjtjel, doeërdronge mit geveul vuur ege heem en sjtrieëk.
't Blieje geveul van der opgeruumde miensj; opgeruumd in hart en gedanke.
Karnavalis bis-te 't ganse joar, 't is 'n manneer va leëve.
Der echte karnavalis kan relativere, zuut de verhoudinge beëter tusje dat wat ech wiechtig is in dit leëve.
't Is inne geveulige miensj deë me mekkelik in 't hart kint rake.

Doarom sjpieële in 't vasteloavessjpieël ('t sjpelke van prinsilveroad en gardeman) emosies zon belangrike rol.

De nar zit de welt op ziene kop en lieët de luuj in de spegel kieke.

Kiek noa dichzelf, kiek wie-ste wurkelik bis en oëerdeel dan ieësj; dat is de boodsjap van de nar.

't Vasteloavessjpieël lieët os weer kindj zin, de ongedwongeheid van 't kindj blief os trikke.

Rondj die ganse ongedwonge oetbundigheid huërt 'n decor.

Zoewie de verseerde den bie krismes.

't Klatergood van de fantasiewelt, mit prinse ongersjeijinge en praalwages is 't heerlikke decor hoe in zich al aafsjieëld.

Der prins nuëdigd os oet om die manneer va leëve mit de 3 dul daag extra te beleëve, 't is egelik 'n oetbundige manneer van bezinne.

Ruum 'ns op in hart en gedanke, prebeer der opgeruumde miensj te were.

Doarom kiek der karnavalis ooch 'ns geer noa 'n anger ieëreteke.

Loestert heë ooch 'ns geer noa 'n angere blieje boodsjap.

Op zien ege manneer, mit zien ege bliedsjap 'n eugske pietsje noa Slevhieër.

't Is 'n leëvesaard, doe kans zelfs karnavalis zin oane vasteloavend te viere.

Wiel Roeselers

Sjpreëkwuërd

Knoakedaag	-	Vrijersdag
Dat is voelvrouwluujssop	-	Pakjes soep
Heë lach mit zie ganse gezich en de naas extra	-	Vriendelijk is anders
Weë luugt, bedruugt	-	Wie liegt, bedriegt
Jieëder kriet zien broeëd gebakke	-	Boontje komt om zijn loontje

Heemkunde ver. Bron v. Brunsham: Schubertstraat 6 6444 BB Brunssum

(secretaris@heemkundebrunssum.nl)

Dialectgroep: Folkloriada 15 6441 DW Brunssum (w.roeselers@hetnet.nl)

Website : www.heemkundebrunssum.nl